

宮
闈
典

宮闈典第六十二卷

東宮部彙考六

唐二

中宗嗣聖元年立永平王成器爲皇太子

卽武后光宅元年

按唐書武后本紀云云

按讓皇帝憲傳讓

皇帝憲始王永平文明元年武后以睿宗爲皇帝故憲立爲皇太子睿宗降爲皇嗣更冊爲皇孫與諸王皆出閣開府置官屬長壽二年降王壽春與衡陽巴陵彭城三王同封復詔入閣中宗立改王蔡固辭不敢當唐隆元年進封宋睿宗將建東宮以憲嫡長又嘗爲太子而楚王有大功故久不定憲辭曰儲副天下公器時平則先嫡國難則先功重社稷也使付授非宜海內失望臣以死請因涕泣固讓時大臣亦言楚王有定社稷功且聖庶抗嫡不宜更議帝嘉憲讓遂許之立楚王爲皇太子以憲爲雍州牧揚州大都督太子太師實封至二千戶賜甲第物段五千良馬二十奴婢十房上田三十頃進尙書右僕射又兼司徒讓司徒更爲太子賓客時太平公主有醜圖姚元崇宋璟白帝請出憲及申王成義爲刺史以銷釋陰計乃以司徒兼蒲州刺史進司空元宗旣討定蕭岑之難進憲

位太尉增千戶固辭更授開府儀同三司解太尉揚州大都督徙王寧又兼太常卿開元十四年表解卿久之復爲太尉歷澤岐涇三州刺史累封至五千五百戶二十九年薨初帝五子列第東都積善坊號五王子宅及賜第上都隆慶坊亦號五王宅元宗爲太子嘗製大衾長枕將與諸王共之睿宗知喜甚及先天後盡以隆慶舊邸爲興慶宮而賜憲及薛王第於勝業坊申岐二王居安興坊環列宮側天子於宮西南置樓其西署曰花萼相輝之樓南曰勤政務本之樓帝時時登之聞諸王作樂必亟召外樓與同榻坐或就幸第賦詩燕嬉賜金帛侑歡諸王日朝側門旣歸卽具樂縱飲擊毬鬪鷄馳鷹犬爲樂如是歲月不絕所至輒中使勞賜相踵世謂天子友悌古無有者帝於敦睦蓋天性然雖讒邪亂其間而卒無以搖時有鵠鵠千數集麟德殿庭樹翔棲浹日左清道率府長史魏光乘作頌以爲天子友悌之祥帝喜亦爲作頌憲尤謹畏未嘗干政而與人交帝亦信重嘗以書賜憲等曰魏文帝詩西山一何高高殊無極上有兩仙童不飲亦不食賜我一丸藥光輝有五色服之四日身體生羽翼朕每言服藥而求羽翼寧如兄弟天生之羽翼乎陳思王之才足以經國絕其朝謁卒使憂死魏祚未終司馬氏奪之豈神丸效耶虞舜至聖捨象傲以親九族九族旣睦平章百

姓今數千載天下歸善焉此朕廢寢忘食所慕歎也頃因餘暇選仙錄得神方云餌之必壽今持此藥願與兄弟共之偕至長齡永永無極也後申王等相繼薨唯憲在帝親待愈益厚每生日必幸其第爲壽往往留宿居常無日不賜遣尙食總監及四方所獻酒酪異饌皆分餉之憲嘗請歲盡錄賜目付史官必數百紙後有疾護醫將膳騎相望也僧崇一者療之少損帝喜甚賜緋袍銀魚已而疾寢劇薨年六十三帝失聲號慟左右皆泣下帝以憲實推天下有高世之行非大號不稱乃追諡讓皇帝遣尙書左丞相裴耀卿太常卿韋縉持節奉冊其子璉表陳憲宿素退讓不敢當大號制不許及斂出天子服一稱詔右監門大將軍高力士以手書寶靈坐贈妃元爲恭皇后葬橋陵旁及葬勅中使諭璉等送終之具使衆見之示以儉薄所司請如諸陵設干味食內壙中監護使耀卿建言尙食料水陸千餘種及馬牛驢犢麋鹿鵝鴨魚鴈體節之味并藥酒三十名盛夏胎養不可多殺考求禮據無所憑依陛下每申讓帝之志務存約素請蠲省折衷詔可旣發引大雨有詔慶王潭等涉途泥步送十里號其墓曰惠陵憲常從帝按舞萬歲樓從複道上見衛士已食棄其餘寶中帝怒詔高力士杖殺之憲從容曰從複道上窺人之私恐士不自安且失大體豈以性命輕於餘殮乎帝遽止

謂力士曰王於我可謂有急難也不然且誤殺士又涼州獻新曲帝御便坐召諸王觀之憲曰曲雖佳然宮離而不屬商亂而暴君卑逼下臣僭犯上發於忽微形於音聲播之詠歌見於人事臣恐一日有播遷之禍帝默然及安史亂世乃思憲審音云憲本名成器避昭成太后諡與申王成義俱改今名憲子十九人其聞者璿嗣莊琳瑀

按舊唐書本傳讓皇帝憲本名成器睿宗長子也初封永平郡王文明元年立爲皇太子時年六歲及睿宗降爲皇嗣則天冊授成器爲皇孫與諸弟同日出閣開府置官屬長壽二年改封壽春郡王仍却入閣長安中累轉左贊善大夫加銀青光祿大夫中宗卽位改封蔡王遷宗正員外卿加賜實封四百戶通舊爲七百戶成器固辭不敢當大國依舊爲壽春郡王唐隆元年進封宋王其月睿宗踐祚拜左衛大將軍時將建儲貳以成器嫡長而元宗有討平韋氏之功意久不定成器辭曰儲副者天下之公器時平則先嫡長國難則歸有功若失其宜海內失望非社稷之福臣今敢以死請累日涕泣固讓言甚切至時諸王公卿亦言楚王有社稷大功合居儲位睿宗嘉成器之意乃許之元宗又以成器嫡長再抗表固讓睿宗不許乃下制曰左衛大將軍宋王成器朕之元子當踐副君以隆基有社稷大功人神僉屬由是朕前懇讓言在必行

天下至公誠不可奪爰符立季之典庶協從人之願成器可雍州牧揚州大都督太子太師別加實封二千戶賜物五千段細馬二十四匹奴婢十房甲第一區良田三十頃其年十一月拜尙書左僕射尋遷司徒其太師都督並如故明年表讓司徒拜太子賓客兼揚州大都督如故時太平公主陰有異圖姚元之宋璟等請出成器及申王成義爲刺史以絕謀者之心由是成器以司徒兼蒲州刺史元宗嘗製一大被長枕將與成器等共申友悌之好睿宗知而大悅累加賞歎先天元年八月進封司空及元宗討平蕭志忠岑羲等成器又進位太尉依舊兼揚州大都督加實封一千戶月餘加授開府儀同三司其太尉揚州大都督並停開元初歷岐州刺史開府如故四年避昭成皇后尊號改名憲封爲寧王實封累至五千五百戶又歷澤潞等州刺史初元宗兄弟聖曆初出閣列第於東都積善坊五人分院同居號五王宅大足元年從幸西京賜宅於興慶坊亦號五王宅及先天之後興慶是龍濟舊邸因以爲宮憲於勝業東南角賜宅申王撝岐王範於安興坊東南賜宅薛王業於勝業西北角賜宅邸第相望環於宮側元宗於興慶宮西南置樓西面題曰花萼相輝之樓南面題曰勤政務本之樓元宗時登樓聞諸王音樂之聲咸召登樓同榻宴謔或便幸其第賜金分帛厚其歡

賞諸王每日於側門朝見歸宅之後卽奏樂縱飲擊毬鬪鷄或近郊從禽或別墅追賞不絕於歲月矣遊踐之所中使相望以爲天子友悌近古無比故人無間然元宗旣篤於昆季雖有讒言交搆其間而友愛如初憲尤恭謹畏慎未曾干議時政及與人交結元宗尤加信重之嘗與憲及岐王範等書曰昔魏文帝詩云西山一何高高處殊無極上有兩仙童不飲亦不食賜我一丸藥光耀有五色服藥四五日身輕生羽翼朕每思服藥而求羽翼何如骨肉兄弟天生之羽翼乎陳思有超代之才堪佐經綸之務絕其朝謁卒令憂死魏祚未終遭司馬宣王之奪豈神丸之効也虞舜至聖捨象傲之愆以親九族九族旣睦平章百姓此爲帝王之軌則於今數千歲天下歸善焉朕未嘗不廢寢忘食欽歎者也頃因餘暇妙選仙經得此神方古老云服之必驗今分此藥願與兄弟等同保長齡永無限極憲開元九年兼太常卿十四年停太常卿依舊爲開府儀同三司二十一年復拜太尉二十八年冬憲寢疾上令中使送醫藥及珍膳相望於路僧崇一療憲稍瘳上大悅特賜緋袍魚袋以賞異崇一時申王等皆先薨唯憲獨在上尤加恩貸每年至憲生日必幸其宅移時宴樂居常無日不賜酒醪及異饌等尙食總監及四方有所進獻食之稍甘卽皆分以賜之憲嘗奏請年終錄付史館

每年至數百紙二十九年冬京城寒甚凝霜封樹時學者以爲春秋雨水冰卽此是亦名樹介言其象介冑也憲見而歎曰此俗謂樹稼者也諺曰樹稼達官怕必有大臣當之吾其死矣十一月薨時年六十三上聞之號叫失聲左右皆掩涕翌日下制曰能以位讓爲吳大伯存則用成其節歿則當表其賢非常之稱旌德斯在故太尉宣王憲誕含粹靈允膺大雅孝悌之至本乎中誠仁和之深非因外獎率由禮度雅尙文儒謙以自牧樂以爲善比兩獻而有光與二南而合德自出臨方鎮入配台階逾勵忠勤益聞周慎實謂永爲藩屏以輔邦家曾不憊遺奄焉歿沒友于之痛震慟良深惟王朕之元昆合昇上嗣以朕奉先朝之睿略定宗社之阡危推而不居請予主鬯又承慈旨焉敢固違不然者則宸極之尊豈歸於薄德茂行若此易名是憑自非大號孰副休烈按諡法推功尙善曰讓德性寬柔曰讓敬追諡曰讓皇帝宜令所司擇日備禮冊命憲長子汝陽郡王璉又上表懇辭盛陳先意謙退不敢當帝號手制不許及冊斂之日內出御衣一副仍令右監門大將軍高力士齎手書寘於靈座之前其書曰隆基白一代兄弟一朝存歿家人之禮是用申情興言感思悲涕交集大哥孝友近古莫儔嘗號五王同開邸第遠自童幼洎乎長成出則同遊學則同業事均形影無不相隨

頃以國步艱危義資克定先帝御極日月照臨大哥嫡長合當儲貳以功見讓爰在薄躬旣嗣守紫宸萬機事總聽朝之暇得展於懷十數年間棟華凋落謂之手足惟有大哥今復淪亡眇然無對以茲感慕何恨如之然以厥初生人孰不殂謝所貴光昭德行以示崇高立德立名斯爲不朽大哥事跡身歿讓存故冊曰讓皇帝神之昭格當茲寵榮況庭訓傳家璫等申讓善述先志實有遺風成其美也恭惟緒言悅焉如在寄之翰墨悲不自勝又制追贈憲妃元氏爲恭皇后祔葬於橋陵之側及將葬上遣中使勅璫等務令儉約送終之物皆令衆見所司請依諸陵舊例壙內置干味食監護使左僕射裴耀卿奏曰尙食所料水陸等味一千餘種每色鉗盛安於藏內皆是非時瓜果及馬牛驢犢麋鹿等肉并諸藥酒三十餘色儀注禮科皆無所憑臣據禮司所料奠祭相次事無不備典制分明天恩每申讓帝之志務令儉約禮外加數竊恐不安又非時之物馬犢驢等并野味魚鴈鵝鴨之屬所用銖兩動皆宰殺盛夏胎養聖情所禁又須造作什物動逾千計求徵市井實謂煩勞干味不共禮無所闕伏望依禮減省以取折衷制從之及發引時屬大雨上令慶王澤已下泥中步送十數里制號其墓爲惠陵憲凡十子璫嗣莊琳璫珣璫玢璫琬璫等十人歷官封襲

神龍二年七月立衛王重俊爲皇太子 按唐書中宗本紀云云 按節愍太子傳節愍太子重俊
聖曆三年王義興神龍初王衛拜洛州牧實封千戶俄領揚州大都督明年爲皇太子以太后喪殺
册禮詔在藩食封歲納東宮給事中盧粲上言太子與列國同食封不可爲法詔罷之重俊性明果
然少法度旣楊璲武崇訓爲賓客二人馮貴寵無學術惟狗馬蹴踘相戲昵左庶子姚珽數上疏諍
導右庶子平貞慎又獻孝經議養德等傳太子納而不克用武三思挾韋后勢將圖逆內忌太子而
崇訓又三思子尙安樂公主常教主辱重俊以非韋出詈爲奴數請廢自爲皇太女三年七月重俊
恚忿遂率李多祚洎左羽林將軍李思冲李承況獨孤禕之沙吒忠義矯發左羽林及千騎兵殺三
思崇訓并其黨十餘人使左金吾大將軍成王千里守宮城自率兵趨肅章門斬關入索韋后安樂
公主昭容上官所在后挾帝升元武門宰相楊再思蘇瓌李嶠及宗楚客紀處訥統兵二千餘人守
太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃
我爪牙忽爲亂能斬賊者有賞於是士倒戈斬多祚餘黨潰重俊亡入終南山欲奔突厥楚客遣果
毅趙思慎追之重俊憩於野爲左右所殺詔殊首朝堂獻太廟并以告三思崇訓樞睿宗立加贈諡

陪葬定陵初重俊被害官屬莫敢視惟永和丞甯嘉勗號哭解衣裹其首時人義之楚客怒收付獄
貶平興丞卒至是亦贈永和令重俊子宗暉景雲三年封湖陽郡王天寶中至太常員外卿薨

按舊唐書本傳武三思得幸中宮深忌重俊三思子崇訓尙安樂公主常教公主凌忽重俊以其非
韋氏所生常呼之爲奴或勸公主請廢重俊爲王自立爲皇太女重俊不勝忿恨三年七月率左羽
林大將軍李多祚右羽林將軍李思沖李承況獨孤禕之沙吒忠義等矯制發左右羽林兵及千騎
三百餘人殺三思及崇訓於其第并殺黨與十餘人又令左金吾大將軍成王千里分兵守宮城諸
門自率兵趨肅章門斬關而入求韋庶人及安樂公主所在又以昭容上官氏素與三思姦通扣閤
索之韋庶人及公主遽擁帝馳赴元武門樓召左羽林將軍劉仁景等令率留軍飛騎及百餘人於
樓下列守俄而多祚等兵至欲突元武門樓宿衛者拒之不得進帝據檻呼多祚等所將千騎謂曰
汝並是我爪牙何故作逆若能歸順斬多祚等與汝富貴於是千騎王歡喜等倒戈斬多祚及李承
況獨孤禕之沙吒忠義等於樓下餘黨遂潰散重俊旣敗率其屬百餘騎趨肅章門奔終南山帝令
長上果毅趙思慎率輕騎追之重俊至鄠縣西十餘里騎不能屬唯從奴數人會日暮憩林下爲左

右所殺制令梟首於朝又獻之於太廟并以祭三思崇訓屍柩睿宗卽位下制曰朕聞曾氏之孝也
慈親惑於疑聽趙鹵之族也明主哀而望思歷考前聞率由舊典重俊大行之子元良守器往羅搆
間困於讒嫉莫顧鈇鉞輕盜甲兵有此誅夷無不悲惋今四凶咸服十起何追方申赤軍之寃以紓
黃泉之痛可贈皇太子諡曰節愍陪葬定陵一子宗暉開元初封湖陽郡王初重俊被害宮府僚吏
莫敢近者永和丞甯嘉勛解衣裹重俊首號哭時人義之宗楚客聞而大怒收付制獄貶爲平興丞
尋卒睿宗踐祚下制曰甯嘉勛能重名節事高欒向幽塗已往生氣凜然靜言忠義追存褒寵可贈
永和縣丞 按大唐新語節愍太子以武三思亂國起北軍誅之旣而韋庶人與安樂公主翊中
宗以登元武門千騎王歡喜倒戈擊太子太子兵散走至鄆縣爲宗楚客之黨所害三思嘗令子崇
訓與安樂公主凌忽太子太子積忿恨遂舉兵而死兆庶咸痛之及睿宗皇帝卽位悼太子殞身徇
難下詔曰曾氏之孝也慈親惑於疑聽趙鹵之族也明主哀而望思歷考前聞率由舊典太子大行
之子元良守器往羅搆間困於讒嫉莫顧鈇鉞輕盜甲兵有此誅夷無不憤惋今四凶滅服十起何
追方申赤軍之寃以紓黃泉之痛可贈皇太子諡曰節愍

睿宗景龍四年夏六月丁未立平王隆基爲皇太子 按唐書睿宗本紀云云 按元宗本紀韋氏已弑中宗矯詔稱制元宗乃與太平公主子薛崇簡尙衣奉御王崇暉公主府典籤王師虔朝邑尉劉幽求苑總監鍾紹京長上折衝麻嗣宗押萬騎果毅葛福順李仙臯道士馮處澄僧普潤定策討亂或請先啟相王元宗曰請而從是王與危事請而不從則吾計失矣乃夜率幽求等入苑中福順仙臯以萬騎兵攻元武門斬左羽林將軍韋播中郎將高嵩以徇左萬騎由左入右萬騎由右入元宗率總監羽林兵會兩儀殿梓宮宿衛兵皆起應之遂誅韋氏黎明馳謁相王謝不先啟相王泣曰賴汝以免不然吾且及難乃拜元宗殿中監兼知內外閑廐檢校隴右羣牧大使押左右兩騎進封平王同中書門下三品睿宗卽位立爲皇太子景雲二年監國聽除六品以下官延和元年星官言帝坐前星有變睿宗曰傳德避災吾意決矣七月壬辰制皇太子宜卽皇帝位太子惶懼入請睿宗曰此吾所以答天戒也皇太子乃御武德殿除三品以下官八月庚子卽皇帝位 按舊唐書元宗本紀睿宗卽位與侍臣議立皇太子僉曰除天下之禍者享天下之福拯天下之危者受天下之安平王有聖德定天下又聞成器已下咸有推讓宜膺主鬯以副羣心睿宗從之丙午制曰舜去四

凶而功格天地武有七德而戡定黎人故必有大勳者必受神明之福仗高義者必爲仁嚮之主朕恭臨寶位覆育寰區以萬物之心爲心以兆人之命爲命雖承繼之道咸以家嫡居尊而無私之懷必推功業爲首然後可保安社稷永奉宗祧第三子平王基孝而克忠義而能勇比以朕居藩邸虔守國彝貴戚中人都無引接羣邪害正兇黨實繁利口巧言讒說罔極草溫延秀朋黨競起晉卿楚客交構其間潛結回邪排擠端善潛貯兵甲將害朕躬基密聞其期先難奮發推身鞠弭衆應如歸呼吸之間凶渠殄滅安七廟於幾墜拯羣臣於將殞方舜之功過四比武之德逾七靈祇望在昆弟樂推一人元良萬邦以定爲副君者非此而誰可立爲皇太子有司擇日備禮册命七月己巳睿宗御承天門皇太子詣朝堂受册是日有景雲之瑞改元爲景雲大赦天下二月又制曰惟天生蒸人牧以元后維皇立國副以儲君將以保綏家邦安固後嗣者也朕纂承洪業欽奉寶圖夜分不寢日昃亡倦茫茫四海懼一人之未周烝烝萬姓恐一物之失所雖卿士竭誠守宰宣化緬懷庶域仍未小康是以求下人之變風遵先朝之故事皇太子基仁孝因心溫恭成德深達禮體能辨皇猷宜令監國俾爾爲政其六品以下除授及徒罪以下並取基處分延和元年六月兇黨因術人聞睿宗曰

據天象帝座及前星有災皇太子合作天子不合更居東宮矣睿宗曰傳德避災吾意決矣七月壬午制曰朕以寡昧虔奉鴻休本殊王季之賢早達延陵之節昔在聖曆已讓皇嗣之尊爰暨神龍終辭太弟之授豈惟衣冠所覩抑亦兆庶咸知頃屬國步不夷時艱主幼大業有綴旒之懼寶位深墜地之憂議迫公卿遂司契篆日慎一日以至於今一紀之勞勤亦至矣萬方之俗化漸行矣將成宿願脫屣寰區昔堯之禪舜惟能是與禹之命啟匪私其親神器之重允歸公授皇太子基有大功於天地定阡危於社稷溫文既習聖敬克躋委之監國已移歲年時政益明庶工惟序朕之知子庶不負時曆數在躬宜陟元后可令卽皇帝位有司擇日受冊朕方比迹洪古希風太皇神與化遊思與道合無爲無事豈不美歟王公百僚宜識朕意上意惶懼馳見叩頭請所以傳位之旨睿宗曰吾因汝功業得宗社今帝座有眚思欲遜避唯聖德大勳始轉禍爲福易位於汝吾知晚矣上始居武德殿視事三品已下除授及徒罪皆自決之按韋安石傳太平公主有異謀欲引安石數因其壻唐媿邀之拒不往帝一日召安石曰朝廷傾心東宮卿胡不察對曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃搆飛變欲訊之賴郭元

振保護免 按姚崇傳睿宗立拜兵部尚書同中書門下三品進中書令元宗在東宮太平公主干

政宋王成器等分典閑廐禁兵崇與宋璟建請主就東都出諸王爲刺史以壹人心帝以謂主主怒太子懼上疏以崇等忤間王室請加罪貶爲申州刺史 按大唐新語景雲二年二月睿宗謂侍

臣曰有術士上言五日內有急兵入宮卿等爲朕備之左右失色莫敢對張說進曰此有讒人設計擬搖動東宮耳陛下若使太子監國則君臣分定自然窺覷路絕災難不生姚崇宋璟郭元振進曰如說所言睿宗大悅卽日詔皇太子監國時太平公主將有奪宗之計於光範門內乘步輦俟執政以諷之衆皆恐懼宋璟昌言曰太子有大功於天下真社稷主安敢妄有異議遂與姚崇奏公主就東都出寧王以下爲刺史以息人心睿宗曰朕更無兄弟唯有太平一妹朝夕欲得相見卿勿言餘並依卿所奏公主聞之大怒元宗懼乃奏崇璟離間骨肉請加罪黜悉停寧王已下外授崇貶申州刺史璟楚州刺史

元宗開元三年正月丁亥立郢王嗣謙爲皇太子降死罪以下原之賜酺三日 按唐書元宗本紀

云云 按太子瑛傳太子瑛始王眞定進王郢開元三年立爲皇太子七年詔太子諸王入國學行

齒冑禮太常擇日謁孔子太子獻詔右散騎常侍褚無量執經羣臣學官諸生以差賜帛明年瑛加元服見太廟十六年詔九品官息女可配太子者有司採闔待進止以太常少卿薛縉女爲妃帝種麥苑中瑛諸王侍登帝曰是將薦宗廟故親之亦欲若等知稼穡之難因分賜侍臣曰春秋書無麥禾古所甚重比詔使者闔田畝所對不以實故朕自蒔以觀其成云初瑛母以倡進善歌舞帝在潞得幸及卽位擢妃父元禮兄常奴皆至大官鄂光二王母亦帝爲臨淄王時以色選及武惠妃寵幸傾後宮生壽王愛與諸子絕等而太子二王以母失職頗怏怏惠妃女咸宜公主壻揚洄揣妃旨伺太子短譁爲醜語惠妃訴於帝且泣帝大怒召宰相議廢之中書令張九齡諫曰太子諸王日受聖訓天下共慶陛下享國久子孫蕃衍奈何一日棄三子昔晉獻公惑嬖姬之讒申生憂死國乃大亂漢武帝信江充巫蠱禍及太子京師喋血晉惠帝有賢子賈后譖之乃至喪亡隋文帝聽后言廢太子勇遂失天下今太子無過二王賢父子之道天性也雖有失尙當掩之惟陛下裁赦帝默然太子得不廢俄而九齡罷李林甫專國數稱壽王美以握妃意妃果德之二十五年洄復構瑛瑤瑤與妃之兄薛鏞異謀惠妃使人詭召太子二王曰宮中有賊請介以入太子從之妃白帝曰太子二王謀